



An Bhruiséil, 15 Eanáir 2026  
(OR. en)

5374/26  
ADD 1

---

---

Comhad Idirinstitiúideach:  
2026/0002 (NLE)

---

---

TRANS 19

## TOGRA

ó:	Ardrúnaí an Choimisiúin Eorpaigh, arna s(h)íniú ag Martine DEPREZ, Stiúrthóir
dáta a fuarthas:	14 Eanáir 2026
chuig:	Thérèse BLANCHET, Ardrúnaí Chomhairle an Aontais Eorpaigh
Uimh. an doic. ón gCoim.:	COM(2026) 5 annex
Ábhar:	IARSCRÍBHINN a ghabhann leis an Togra le haghaidh CINNEADH ÓN gCOMHAIRLE maidir leis an seasamh atá le glacadh thar ceann an Aontais sa Chomhchoiste arna bhunú faoin bPrótacal a ghabhann leis an gComhaontú maidir le hiompar idirnáisiúnta ócáideach paisinéirí de chóiste agus de bhus (Comhaontú Interbus) maidir le hiompar tráthrialta idirnáisiúnta agus iompar tráthrialta speisialta paisinéirí de chóiste agus de bhus, a mhéid a bhaineann le dréacht-Chinneadh Uimh. x/xxxx ón gCoiste sin lena mbunaítear a Rialacha Nós Imeachta

Gheobhaidh na toscaireachtaí i gceangal leis seo doiciméad COM(2026) 5 annex.

---

Faoi iamh: COM(2026) 5 annex



AN COIMISIÚN  
EORPACH

An Bhruiséil, 14.1.2026  
COM(2026) 5 final

ANNEX

## IARSCRÍBHINN

a ghabhann leis an Togra le haghaidh

**CINNEADH ÓN gCOMHAIRLE**

**maidir leis an seasamh atá le glacadh thar ceann an Aontais sa Chomhchoiste arna bhunú faoin bPrótacal a ghabhann leis an gComhaontú maidir le hiompar idirnáisiúnta ócáideach paisinéirí de chóiste agus de bhus (Comhaontú Interbus) maidir le hiompar tráthrialta idirnáisiúnta agus iompar tráthrialta speisialta paisinéirí de chóiste agus de bhus, a mhéid a bhaineann le dréacht-Chinneadh Uimh. x/xxxx ón gCoiste sin lena mbunaítear a Rialacha Nós Imeachta**

## IARSCRÍBHINN

**Cinneadh Uimh. x/xxxx ón gComhchoiste arna bhunú faoin bPrótacal a ghabhann leis an gComhaontú maidir le hiompar idirnáisiúnta ócáideach paisinéirí de chóiste agus de bhus (Comhaontú Interbus) maidir le hiompar tráthrialta idirnáisiúnta agus iompar tráthrialta speisialta paisinéirí de chóiste agus de bhus**

**an [CUIR ISTEACH AN DÁTA]**

**lena mbunaítear a Rialacha Nós Imeachta**

TÁ AN COMHCHOISTE,

Ag féachaint don Phrótacal maidir le hiompar tráthrialta idirnáisiúnta agus iompar tráthrialta speisialta paisinéirí de chóiste agus de bhus<sup>1</sup> a ghabhann leis an gComhaontú maidir le hiompar idirnáisiúnta ócáideach paisinéirí de chóiste agus de bhus (Comhaontú Interbus)<sup>2</sup>, agus go háirithe Airteagal 18 de.

De bharr an mhéid seo a leanas:

- (1) Le hAirteagal 18(1) den Phrótacal maidir le hiompar tráthrialta idirnáisiúnta agus iompar tráthrialta speisialta paisinéirí de chóiste agus de bhus (dá ngairtear ‘an Prótacal’ anseo feasta), bunaítear Comhchoiste atá comhdhéanta d’ionadaithe ó na Páirtithe Conarthacha chun bainistiú an Phrótacail a éascú.
- (2) I gcomhréir le hAirteagal 18(2) den Phrótacal, ba cheart feidhm *mutatis mutandis* a bheith ag Airteagail 23 agus 24 de Chomhaontú Interbus maidir le hiompar idirnáisiúnta ócáideach paisinéirí de chóiste agus de bhus (dá ngairtear ‘Comhaontú Interbus’ anseo feasta) maidir leis an gComhchoiste arna bhunú faoin bPrótacal.
- (3) Dá bhrí sin, ba cheart don Chomhchoiste a bhunaítear faoin bPrótacal a Rialacha Nós Imeachta a ghlacadh, de bhun Airteagal 18(2) den Phrótacal agus Airteagal 23(3) de Chomhaontú Interbus. Ba cheart Rialacha Nós Imeachta an Chomhchoiste arna bhunú faoin bPrótacal a bheith ag comhfhreagairt, leis na hoiriúnuithe is gá, do Rialacha Nós Imeachta an Chomhchoiste arna bhunú faoi Chomhaontú Interbus<sup>3</sup>,

TAR ÉIS A CHINNEADH MAR A LEANAS:

### *Airteagal 1*

Leis seo, glactar Rialacha Nós Imeachta an Chomhchoiste, mar a leagtar amach san Iarscríbhinn a ghabhann leis an gCinneadh seo.

---

<sup>1</sup> IO L 122, 5.5.2023, lch. 1.

<sup>2</sup> IO L 321, 26.11.2002, lch. 13.

<sup>3</sup> IO L 8, 12.1.2012, lch. 38.

*Airteagal 2*

Tiocfaidh an Cinneadh seo i bhfeidhm ar dháta a ghlactha.

Arna dhéanamh sa Bhruiséil, [CUIR ISTEACH AN DÁTA]

Thar ceann an Chomhchoiste:

*An Cathaoirleach*

*An Rúnaí*

## *IARSCRÍBHINN*

**Rialacha Nós Imeachta an Chomhchoiste arna bhunú faoin bPrótacal a ghabhann leis an gComhaontú maidir le hiompar idirnáisiúnta ócáideach paisinéirí de chóiste agus de bhus (Comhaontú Interbus) maidir le hiompar tráthrialta idirnáisiúnta agus iompar tráthrialta speisialta paisinéirí de chóiste agus de bhus**

### *Airteagal 1*

#### **Ainm an Chomhchoiste**

An Comhchoiste arna bhunú faoi Airteagal 18 den Phrótacal a ghabhann leis an gComhaontú maidir le hiompar idirnáisiúnta ócáideach paisinéirí de chóiste agus de bhus (Comhaontú Interbus) maidir le hiompar tráthrialta idirnáisiúnta agus iompar tráthrialta speisialta paisinéirí de chóiste agus de bhus (dá ngairtear ‘an Prótacal’ anseo feasta), gairfear ‘an Choiste’ anseo feasta air.

### *Airteagal 2*

#### **Cathaoirleacht**

1. Is é ceann thoscaireacht an Aontais, nó i gcás inar gá a ionadaí nó a hionadaí, a mbeidh an bheirt acu ina n-ionadaithe ar an gCoimisiún Eorpach (dá ngairtear ‘an Coimisiún’ anseo feasta), a bheidh ina chathaoirleach nó ina cathaoirleach ar an gCoiste thar ceann an Aontais Eorpaigh.
2. Stiúrfaidh an Cathaoirleach obair an Choiste.

### *Airteagal 3*

#### **Toscaireachtaí**

1. Na Páirtithe Conarthacha a bhfuil an Prótacal i bhfeidhm ina leith (dá ngairtear ‘na Páirtithe’ anseo feasta), ceapfaidh siad a n-ionadaithe don Choiste. Beidh toscaireacht an Aontais comhdhéanta d’ionadaithe ón gCoimisiún, agus ionadaithe ó na Ballstáit ag tabhairt cúnaimh dóibh.
2. Ceapfaidh gach Páirtí ceann a thoscaireachta agus, i gcás inar gá, leas-cheann a thoscaireachta.

3. Féadfaidh gach Páirtí ionadaithe nua a cheapadh ar an gCoiste. Cuirfear Rúnaí an Choiste ar an eolas láithreach i scríbhinn faoi aon athruithe den sórt sin.
4. Féadfaidh ionadaithe Ardrúnaíocht Chomhairle an Aontais Eorpaigh páirt a ghlacadh i gcrúinnithe an Choiste mar bhreathnóirí. Féadfaidh an Cathaoirleach, le comhaontú na gceann toscaireachta eile, cuireadh a thabhairt do dhaoine nach comhaltaí de thoscaireachtaí iad freastal ar chruinniú den Choiste chun faisnéis a sholáthar maidir le hábhair shonracha.
5. Seachtain amháin ar a laghad roimh an gcrúinniú, tabharfaidh na Páirtithe fógra do Rúnaí an Choiste faoi chomhdhéanamh a dtoscaireachta.

#### *Airteagal 4*

### **An Rúnaíocht**

1. Cuirfidh ionadaí ón gCoimisiún an Rúnaíocht ar fáil don Choiste. Is é Cathaoirleach an Choiste a cheapfaidh an Rúnaí agus comhlíonfaidh sé nó sí a chuid dualgas nó a cuid dualgas go dtí go gceapfar Rúnaí nua. Cuirfidh an Cathaoirleach ainm agus sonraí an Rúnaí in iúl do na Páirtithe eile.
2. Beidh an Rúnaí freagrach as cumarsáid idir na toscaireachtaí, lena n-áirítear doiciméid a tharchur, agus déanfaidh sé nó sí maoirseacht ar dhualgais rúnaíochta.

#### *Airteagal 5*

### **Cruinnithe an Choiste**

1. Tiocfaidh an Coiste le chéile arna iarraidh sin do Pháirtí amháin ar a laghad. Is é an Cathaoirleach a thionólfadh é.
2. Cuirfidh an Cathaoirleach fógra faoin gcrúinniú, mar aon leis an dréachtchlár oibre agus doiciméid an chruinnithe, chuig cinn na dtoscaireachtaí eile 15 lá oibre ar a laghad roimh thús an chruinnithe.
3. Féadfaidh Páirtí a iarraidh ar an gCathaoirleach an tréimhse fógra dá dtagraítear i mír 2 a ghiorrú chun an phráinn a bhaineann le hábhar áirithe a chur san áireamh.
4. Mura gcinnfidh na cinn toscaireachta a mhalairt, ní bheidh cruinnithe an Choiste poiblí.
5. Tiocfaidh an Coiste le chéile sa Bhruiséil, mura gcomhaontóidh na Páirtithe teacht le chéile in áit eile nó go cianda.

## *Airteagal 6*

### **Clár oibre**

1. Déanfaidh an Cathaoirleach, le cúnaimh ón Rúnaí, an dréachtchlár oibre a tharraingt suas do gach cruinniú agus socróidh sé dáta agus ionad an chruinnithe tar éis dul i gcomhairle le cinn na dtoscaireachtaí eile. Cuirfidh an Cathaoirleach an clár oibre sealadach chuig na cinn toscaireachta eile 15 lá oibre ar a laghad roimh thús an chruinnithe. Beidh na doiciméid oibre uile is gá ag gabháil leis an gclár oibre.
2. Ní bheidh feidhm ag an tréimhse fógra a leagtar síos i mír 1 maidir le cruinnithe práinneacha a thionóltar i gcomhréir le hAirteagal 5(3).
3. Féadfaidh gach Páirtí mír amháin nó níos mó a mholadh le cur leis an gclár oibre sealadach 24 uair an chloig ar a dhéanaí roimh thús an chruinnithe. Déanfar iarrataí ar mhíreanna a chur leis an gclár oibre a chur chuig an gCathaoirleach i scríbhinn, agus an chúis atá leis sin á cur in iúl.
4. Ag tús an chruinnithe, glacfaidh an Coiste an clár oibre. Féadfaidh an Coiste a chinneadh aon mhír nach bhfuil ar an gclár oibre sealadach a chur leis an gclár oibre.

## *Airteagal 7*

### **Gníomhartha a ghlacadh**

1. Glacfar cinntí an Choiste trí vóta d'aon toil ag na páirtithe a bhfuil ionadaíocht á déanamh orthu, i gcomhréir le hAirteagal 23(5) agus (6) de Chomhaontú Interbus. Is trí chomhthoil idir toscaireachtaí na bpáirtithe a ndéantar ionadaíocht orthu a ghlacfar na moltaí, agus go háirithe na moltaí dá dtagraítear in Airteagal 24(2)(g) de Chomhaontú Interbus, atá infheidhme *mutatis mutandis* maidir leis an gCoiste. Beidh an teideal 'Cinneadh' nó 'Moladh' ar na cinntí agus ar na moltaí agus, ina dhiaidh sin, beidh sraithuimhir, dáta a nglactha agus léiriú ar a bhfuil iontu orthu.
2. Beidh síniú an Chathaoirligh agus an Rúnaí ar chinntí agus ar mholtaí an Choiste. Cuirfidh an Rúnaí chuig na cinn toscaireachta eile iad.
3. Féadfaidh gach Páirtí a chinneadh aon ghníomh a ghlacfaidh an Coiste a fhoilsiú.
4. Féadfar gníomhartha an Choiste a ghlacadh trí nós imeachta i scríbhinn i gcás ina gcomhaontaíonn na cinn toscaireachta é sin. Cuirfidh an Cathaoirleach an dréachtghníomh faoi bhráid na gceann toscaireachta eile agus cuirfidh siad in iúl mar fhreagra an nglacann siad leis an dréacht nó nach nglacann, an molann siad leasuithe ar an dréacht nó an dteastaíonn níos mó ama uathu chun é a bhreithniú. Má ghlactar an dréacht, cuirfidh an Cathaoirleach bailchríoch ar an gcinneadh nó ar an moladh i gcomhréir le mír 1 agus le mír 2 thuas.

5. Déanfar na moltaí agus na cinntí a tharraingt suas i mBéarla, i bhFraincis agus i nGearmáinis, agus tá gach téacs díobh barántúil. Beidh gach Páirtí freagrach as cinntí agus moltaí a aistriú i gceart go dtí a theanga oifigiúil nó a theangacha oifigiúla. Is é an Coimisiún a dhéanfaidh an t-aistriúchán go teangacha eile de chuid an Aontais.

### *Airteagal 8*

#### **Miontuairiscí**

1. Tarraingeoidh an Rúnaí suas, faoi fhreagracht an Chathaoirligh, dréacht-mhiontuairiscí ar gach cruinniú den Choiste laistigh de 15 lá oibre tar éis an chruinnithe.
2. Léireofar sna miontuairiscí, mar riail ghinearálta, maidir le gach mír ar an gclár oibre:
  - mionsonraí na ndoiciméad a cuireadh faoi bhráid an Choiste,
  - ráitis a d'iarr Páirtí go ndéanfaí iad a thaifeadadh,
  - cinntí a rinneadh, moltaí a rinneadh agus conclúidí a glacadh.
3. Cuirfear na dréacht-mhiontuairiscí faoi bhráid an Choiste lena bhformheas i gcomhréir leis an nós imeachta i scríbhinn dá dtagraítear in Airteagal 7(4). Mura gcuirfear an nós imeachta sin i gcrích, glacfaidh an Coiste na miontuairiscí ag an gcéad chruinniú eile a bheidh aige.
4. A luaithe a ghlacfaidh an Coiste na miontuairiscí, síneoidh an Cathaoirleach agus an Rúnaí iad agus coinneoidh an Rúnaí iad. Cuirfidh an Rúnaí cóip chuig na cinn toiscaireachta eile.

### *Airteagal 9*

#### **Rúndacht**

D'ainneoin na forála maidir le gníomhartha a fhoilsiú a leagtar síos in Airteagal 7(3), beidh plé na gcruinnithe agus doiciméid an Choiste faoi rialú ag rúndacht ghairmiúil.

### *Airteagal 10*

#### **Caiteachais**

1. Seasfaidh gach Páirtí na costais a thabhoíd sé agus é ag glacadh páirte i gcruinnithe an Choiste.

2. Déanfaidh an Coiste cinneadh maidir le haisíocaíocht caiteachais a bhaineann le misin a shanntar do dhaoine a ghlaonn an Cathaoirleach isteach i gcomhréir le hAirteagal 3(4).

### *Airteagal 11*

#### **Comhfhreagras**

Cuirfear gach comhfhreagras le Cathaoirleach an Choiste nó comhfhreagras uaidh chuig Rúnaí an Choiste. Cuirfidh an Rúnaí cóip den chomhfhreagras go léir a bhaineann leis an bPrótocal chuig na toscaireachtaí go léir.

### *Airteagal 12*

#### **Teangacha**

Is é an Coiste a chinnfidh na teangacha a úsáidfear i gcrúinnithe an Choiste agus i ndoiciméid. Ní bheidh aon oibleagáid ar an bPáirtí a bheidh ina óstach ar an gcrúinniú ateangaireacht a chur ar fáil le haghaidh teangacha eile.